

Reglugerð um ráðstafanir vegna heimsfaraldurs COVID-19

1. gr.

Gildissvið

Reglugerð þessi gildir um Íslandsmót og bikarkeppni BLÍ keppnistímabil 2021-2022. Ákvæði reglugerðar þessarar gilda umfram ákvæði annarra reglugerða ef grípa þarf til ráðstafna vegna COVID-19 faraldursins.

2. gr.

Bikarkeppni BLÍ

Skv. Mótaskrá BLÍ eiga 8 liða úrslit Kjörisbikarsins 2022 að fara fram dagana 9.-13. mars. Mótanefnd hefur ákveðið að leikir í 8 liða úrslitum fari fram við fyrsta mögulega tækifæri til að tryggja að Bikarhelgi BLÍ geti farið fram á réttum tíma, dagana 1.-3. apríl. Leikjum í 8 liða úrslitum skal komið fyrir í mótaskrá þar sem pláss gefst og skulu þeir leiknir við fyrsta tækifæri og eigi síðar en 13. mars. Mótanefnd raðar leikjunum niður og tilkynnir félögunum um leikdaga.

3. gr.

Íslandsmót neðri deilda

Stefnt er að því að leika þrjú helgarmót á tímabilinu. Helgarmóti #2, sem átti að fara fram í janúar, færirst til mars og verður leikið á helgi nr. 3. Mótanefnd vinnur að nýrri dagsetningu fyrir helgarmót #3 (úrslitakeppni neðri deilda) en leikið skal eigi síðar en 2. maí 2022.

Takist að halda tvö helgarmót í stökum neðri deildum en ekki úrslitakeppni (þriðja helgarmót) skal krýna deildarmeistara þeirra deilda samkvæmt 7. grein Covid reglugerðar.

Ef ekki tekst að ljúka úrslitakeppni neðri deilda skal eftirfarandi regla gilda um færslur liða milli deilda að lokinni deildarkeppni.

- **2. deild kvenna** – Sigurvegari krýndur Íslandsmeistari, ekkert lið fer upp um deild en þrjú neðstu liðin falla í 3. deild.
- **3. deild kvenna** – Sigurvegari krýndur Íslandsmeistari, þrjú lið fara upp í 2. deild og þrjú neðstu liðin falla í 4. deild.
- **4. deild kvenna** - Sigurvegari krýndur Íslandsmeistari, þrjú lið fara upp í 3. deild og þrjú neðstu liðin falla í 5. deild.
- **5. deild kvenna** - Sigurvegari krýndur Íslandsmeistari, þrjú lið fara upp í 4. deild og tvö neðstu liðin falla í 6. deild.
- **6. deild kvenna** - Sigurvegari krýndur Íslandsmeistari, tvö lið fara upp í 5. deild. Ekkert lið fellur úr 6. deild.

- **2. deild karla** - Sigurvegari krýndur Íslandsmeistari, ekkert lið fer upp um deild en þrjú neðstu liðin falla í 3. deild.
- **3. deild karla** - Sigurvegari krýndur Íslandsmeistari, þrjú lið fara upp í 2. deild. Ekkert lið fellur úr 3. deild.

4. gr.

Frestun leikja

Mótanefnd skal fresta leik í úrvalsdeild eða 1. deild óski félag eftir frestun ef þrír eða fleiri af sjö hrinuhæstu leikmönnum liðs geta ekki tekið þátt í viðkomandi keppnisleik þar sem þeim hefur verið gert að sæta einangrun eða sóttkví samkvæmt reglugerð heilbrigðisráðherra, eftir að hafa verið greindir með COVID-19 eða verið útsettir fyrir COVID-19 smiti.

Verði íþróttaviðburðir meistaraflokka bannaðir með reglum útgefnum af yfirvöldum eða að sóttvarnarlæknir eða almannavarnir mæli gegn því að kappleikir fari fram vegna heimsfaraldurs COVID-19, skal mótanefnd fresta öllum leikjum á leikjaskrá á þeim tíma sem bannið eða tilmælin taka til.

5. gr.

Nýir leikdagar

Ef þær aðstæður, sem urðu þess valdandi að leik eða leikjum var frestað skv. 4. grein, standa ekki lengur í vegi fyrir því að leikir geti farið fram, skal mótanefnd BLÍ setja þá leiki sem frestað var á nýja leikdaga innan dagskrár hvers móts.

Mótanefnd hefur heimild til að breyta eða setja á nýjan leiktíma með 3 sólarhringa fyrirvara með samþykki beggja félaga. Mótanefnd hefur einnig heimild til að samþykkja óskir félaga um frestun á leik ef **a)** bæði félög hafa náð samkomulagi um frestunina, **b)** tillaga að nýrri dagsetningu liggur fyrir og **c)** óskin um frestun hafi borist til mótastjóra/mótanefndar í síðasta lagi 24 klst. fyrir settan leiktíma.

6. gr.

Mótslok

Mótanefnd skal kappkosta við að ljúka móti innan þess ramma sem viðburðadagatal gerir ráð fyrir. Takist ekki að ljúka móti innan þess ramma, er mótanefnd heimilt að framlengja mótið ef líkur eru á, að mati mótanefndar, að hægt verði að ljúka viðkomandi móti.

Mótanefnd er heimilt, telji hún það nauðsynlegt, að flytja leiki í bikarkeppni aftur fyrir lokadag í deildarkeppni.

Þurfi að fresta leikjum skv. 4. grein, skal ljúka deildakeppni, úrslitakeppni og bikarkeppni eigi síðar en 1. júní 2022.

7. gr.

Móti aflýst

Vegna sérstakra aðstæðna er mótanefnd heimilt að leggja til við stjórn BLÍ að ljúka deildakeppni í úrvalsdeild þegar öll lið hafi leikið að lágmarki 2/3 af heildarleikjafjölda sínum og krýna deildarmeistara. Við þær aðstæður skal endanleg röð liða í deildakeppni fara eftir ákvæði 7.1. Er þetta heimilt telji mótanefnd nauðsynlegt að stytta deildakeppni svo unnt sé að leika úrslitakeppni og krýna Íslandsmeistara. Við þessar aðstæður er mótanefnd jafnframt heimilt að breyta fyrirkomulagi úrslitakeppninnar að því marki sem mótanefnd metur það nauðsynlegt svo unnt sé að ljúka úrslitakeppni. Íslandsmeistarar verða aðeins krýndir takist að ljúka úrslitakeppni.

Ef sýnt þykir að ekki verði unnt að ljúka Íslandsmóti eða bikarkeppni meistaraflokka samkvæmt leikjaskrá vegna COVID-19 getur mótanefnd lagt það fyrir stjórn BLÍ að aflýsa keppni í öllum deildum. Skal þá eftirfarandi gilda:

- 7.1. Hafi að lágmarki 2/3 hlutar heildarleikja í deildakeppni úrvals- og 1. deildar verið leiknir samkvæmt leikjaskrá ræður meðalfjöldi stiga hvers liðs fyrir sig í hverjum leik sem það hefur lokið á þeim þegar móti er aflýst, endanlegri niðurröðun. Séu lið jöfn að stigum skal erfiðleikastuðull þeirra leikja sem liðin hafa þegar leikið skera úr á milli liða þannig að það lið sem hefur hæstan erfiðleikastuðul skal raðast efst jafnra liða. Hvert lið fær samanlagðan meðalstigafjölda þeirra liða sem það hefur spilað við í erfiðleikastuðul (hafi liðið spilað við eitthvert annað lið oft en einu sinni fær fyrrnefnda liðið meðalstigafjölda þess síðarnefnda jafn oft og þau hafa att kappi). Séu lið enn jöfn skal meðalhrinuhlutfall í hverjum leik skera úr um röð liða og þar á eftir meðalstigahlutfall í hverjum leik. Telst keppni í Íslandsmóti þar með lokið.
Deildarmeistarar deilda skulu þá krýndir í hvorri deild. Engir Íslandsmeistarar verða krýndir án úrslitakeppni.
- 7.2. Takist ekki að leika 2/3 hluta leikja í deildakeppni úrvals- og 1. deildar áður en keppni er aflýst, verða engir deildarmeistarar krýndir og staða liða við upphaf næsta tímabils verður sú sama og við upphaf þess tímabils sem ekki var hægt að ljúka.
- 7.3. Takist að halda tvö helgarmót í stökum neðri deildum en ekki úrslitakeppni (þriðja helgarmót) skal krýna deildarmeistara þeirra deilda. Færsla á milli deilda er unnin skv. 3. grein. Engin færsla verður þó milli deilda án þess að allar neðri deildir hjá sama kyni ljúki minnst 2/3 hluta leikja samkvæmt leikjaskrá.
- 7.4. Ef tekst að halda úrslitakeppni neðri deilda (þriðja helgarmót) skal leikið í samræmi við röðun liða fyrir 2. maí 2022.
- 7.5. Takist ekki að ljúka bikarkeppninni skal ekkert lið krýnt bikarmeistari.
- 7.6. Mótanefnd leggur tillögur fyrir stjórn BLÍ hvernig ljúka skuli keppni yngri flokka.

8. gr.

Sektir, brottvísun úr keppni og önnur atvik

Geti lið, sem uppfyllir skilyrði greinar 4, ekki uppfyllt skyldur sínar samkvæmt reglugerð BLÍ um Íslandsmót skal hvorki beitt sektum né öðrum viðurlögum.

Stjórn BLÍ hefur lokaákvörðunarvald um öll þau málefni sem reglugerð þessi nær ekki sérstaklega til, og getur þá leitað í aðrar reglugerðir sambandsins eða vinnureglur mótanefndar.

9. gr.

Félagaskipti

Félagaskiptagluggi er opinn frá 1. janúar 2022 til 31. janúar 2022 (óbreytt úr Reglugerð BLÍ frá 2021).

Mótanefnd leggur til að félagaskiptagluggi neðri deilda verði opnaður eftir helgarmót #2 þar sem venjan er sú að félagaskiptaglugginn sé ávallt opinn eftir helgarmót #2. Skráðir leikmenn í Úrvals- og 1. deild fá ekki keppnisleyfi í neðri deild í þeim félagaskiptaglugga.

Frekari útfærsla verður kynnt af mótanefnd að loknu helgarmóti #2 í mars mánuði.

Félagaskipti opna að nýju eftir leiktímabil, eða frá 1. júní 2022 og er sá gluggi opinn til 31. október 2022 eins og stendur í reglugerð um félagaskipti.

10. gr

Gildistaka og gildistími

Reglugerð þessi er sett með stoð í lögum BLÍ og öðlast þegar gildi.

Reglugerðin fellur úr gildi 1. júlí 2022.

Reglugerð samþykkt af stjórn BLÍ þann 7. janúar 2022.